

## O Ezdraš

### *O Izraeliti aven pale andro Jeruzalem*

<sup>1</sup> Andre ešebno berš, sar kralinelas o perziko kralis Kiros, pes ačhiła oda lav, so phenda o RAJ prekal o prorokos Jeremijaš, avke, hoj o RAJ thođa pro jilo le kraliske Kiroske te pisinel a te phenel avri andre calo peskro krališagos kada:

<sup>2</sup> „Kada phenel o perziko kralis Kiros:

„O RAJ, o Del le ņeboskro, mange diňa savore krališagi pre phuv a kidňa peske man avri, hoj leske te ačhavav Chramos andro Jeruzalem andre Judsko.

<sup>3</sup> Akana sako, ko patrinel ke leskre manuša, mi džal pale andro Jeruzalem andre Judsko a mi ačhavel o Chramos le RAJESKRO, le Izraeloskre Devleskro, ole Devleskro, saves lašaren andro Jeruzalem. Mi avel leha leskro Del.

<sup>4</sup> A te varekaske olendar, ko dživel andre kadi phuv sar cudzincos, kampil e pomoca te dochudel pes pale khere, o manuša lenge mi pomožinen. Mi den len rup, somnakaj, zasobi, dobitkos the o dari, so kamen te del prekal o Chramos le Devleskro andro Jeruzalem.’ “

<sup>5</sup> Avke pes o famelijengre vodci andral o kmeňi Juda the Benjamin, o rašaja the o Leviti a dojekh, ke kaste o Del prevakerđa, hoj te džal te ačhavel o Chramos le RAJESKRO, pripravinenas te džal andro Jeruzalem.

<sup>6</sup> Savore manuša, save bešenas paš lende, len dine rupune čare, somnakaj, zasobi, dobitkos, vzacna veci the o dari prekal o Chramos.

<sup>7</sup> O kralis Kiros lenge diña pale ola veci andral o Chramos le RAJESKRO, save iła o Nebukadnecar andral o Jeruzalem a thoda andre peskro chramos.

<sup>8</sup> O perziko kralis Kiros prikazinda, hoj len te anel o Mitredat, leskro pokladnikos, hoj len te prerachinel a te del le judske guverneriske Šešbacaroske.

<sup>9</sup> Oda sas tranda (30) somnakune čare, ezeros (1 000) rupune čare, bišueña (29) lopatki pro kadidlos,

<sup>10</sup> tranda (30) somnakune kuča, štar šel the deš (410) rupune kuča a ezeros (1 000) aver čare.

<sup>11</sup> Savore somnakune the rupune čare sas 5 400. Kada savoro iła o Šešbacar a lidžalas andral o Babilon jekhetane le manušenca, so džanas pale andro Jeruzalem.

## 2

### *O manuša, so avle pale andro Jeruzalem*

<sup>1</sup> Kala hine o manuša, saven o kralis Nebukadnecar zaila a odligenda andro Babilon, a save gele pale andro Jeruzalem the andre Judsko, sako andre peskro foros.

<sup>2</sup> On avle peskre vodcenca, save sas o Zerubabel, o Ješua, o Nechemiah, o Serajah, o Reelajah, o Mordochaj, o Bilšan, o Mispar, o Bigvaj, o Rechum the o Baanah.

A sas oda kajci džene andral o fameliji le Izraeloskre:

3 andral le Parošoskri famelija sas 2 172 potomki,

4 andral le Šefatjoskri 372,

5 andral le Arachoskri 775,

6 andral le Pachat-Moaboskri famelija - potomki pal o Ješua the Joab - 2 812,

7 andral le Elamoskri 1 254,

8 andral le Zatuoskri 945,

9 andral le Zakajoskri 760,

10 andral le Baniskri 642,

11 andral le Bebajoskri 623,

12 andral le Azgadoskri 1 222,

13 andral le Adonikamoskri 666,

14 andral le Bigvajoskri 2 065,

15 andral le Adinoskri 454,

16 andral le Ateroskri, saves vičinenas the Chizkija\*, 98,

17 andral le Becajoskri 323,

18 andral le Joroskri 112,

19 andral le Chašumoskri 223,

20 a andral le Gibaroskri sas 95 potomki.

21 Gele pale the ola manuša, savengre phure dada sas andral kala fori: andral o Betlehem 123,

22 andral e Netofa 56,

23 andral o Anatot 128,

24 andral o Azmavet 42,

25 andral o Kirjat-Jearim, andral e Kefira the andral o Beerot 743,

26 andral e Rama the Geba 621,

27 andral o Michmas 122,

28 andral o Betel the Aj 223,

---

\* **2:16** Andre varesave prekladi hin leskro nav Ezechiaš.

- 29 andral o Nebo 52,  
30 andral o Magbiš 156,  
31 andral o Elam 1 254,  
32 andral o Charim 320,  
33 andral o Lod, Chadid the Ono 725,  
34 andral o Jericho 345,  
35 the andral o Senaah 3 630 manuša.  
36 Kala savore hine potomki le rašajengre famelijendar, save avle pale: andral le Jedajoskri 973 potomki le Ješuaskre,  
37 andral le Imeroskri 1 052,  
38 andral le Paščuroskri 1 247  
39 a andral le Charimoskri 1 017.  
40 Kala savore hine potomki le Levitengre famelijendar, save avle pale: 74 andral e famelija le Ješuaskri the Kadmieloskri, save sas potomki le Hodavijoskre.  
41 O lavutara le chramoskre: 128 potomki le Asafoskre.  
42 O stražnika paš o chramoskre brani: 139 potomki le Šalumoskre, le Ateroskre, le Talmonoskre, le Akuboskre, le Chatitoskre the le Šobajoskre.  
43 O služobnika le chramoskre sas o potomki le Cichasoskre, le Chasufaoskre, le Tabaotoskre,  
44 le Keroskre, le Sijoskre, le Padonoskre,  
45 le Lebanoskre, le Chagaboskre, le Akuboskre,  
46 le Chagaboskre, le Šamlajoskre, le Chananoskre,  
47 le Gideloskre, le Gacharoskre, le Reajoskre,  
48 le Recinoskre, le Nekodaoskre, le Gazamoskre,

49 le Uzoskre, le Paseachoskre, le Besajoskre,  
50 le Asnoskre, le Meunimoskre, le Ne-  
fusimoskre,

51 le Bakbukoskre, le Chakufoskre, le  
Charchuroskre,

52 le Baclutoskre, le Mechidaoskre, le  
Charšaoskre,

53 le Barkososkre, le Siseroskre, le Tema-  
choskre,

54 le Neciachoskre the le Chatifoskre.

55 O potomki le Šalamunoskre  
služobnikengre, save avle pale, sas le Sotajoskre,  
le Soferetoskre, le Perudasoskre,

56 le Jaaloskre, le Darkonoskre, le Gideloskre,

57 le Šefatjoskre, le Chatiloskre, le Pocheret-  
Hacebajimoskre the le Amioskre.

58 Savore chramoskre služobnika the le  
Šalamunoskre služobnikengre potomki sas 392.

59 The 652 manuša avle pale andral o ba-  
biloñika fori Tel-Melach, Tel-Charša, Kerub,  
Adan the Imer, ale ča naši presikade, hoj hine  
Izraeliti.

60 Sas andral o fameliji le Delajoskre, le Tobi-  
joskre the le Nekodaskre.

61 Kala trin fameliji naši presikade, hoj sas  
rašaja: le Chobajoskri, le Hakocoskri the le  
Barzilajoskri. O Barzilaj sas murš, savo peske iľa  
romña le Barzilajoskra čha andral o Gilead a iľa  
peske lakro nav.

62 On rodenas peskra famelijakro zvitkos, kaj  
sas zapisimen ale les na arakhle, a vašoda len  
premukle andral e rašajiko služba.

<sup>63</sup> Le kraliskro guverneris lenge prikazinda, hoj naši chan le chabenestar, so hino obetimen le Devleske, medik ode na ela rašaj, savo šaj phučel le RAJESTAR prekal o losi Urim the Tumim.

<sup>64</sup> Savore, ko gele pale andre Judsko, sas jekhetane 42 360 manuša.

<sup>65</sup> A mek avle lenča 7 337 sluhi the služki a 200 spevaka the spevački.

<sup>66</sup> Len sas 736 graja, 245 mulici,

<sup>67</sup> 435 řavi the 6 720 somara.

<sup>68</sup> Sar ola manuša doavle ko Chramos le RAJESKRO andro Jeruzalem, varesave famelijengre vodci denas o dari pro Chramos korkore pestar, hoj les pale te ačhaven pre oda than, kaj ačhelas.

<sup>69</sup> Dojekh lendar anenas andro pokladni ajci, keci šaj denas pre buči pro Chramos: 500 kili somnakaj, 2 800 kili rup the 100 rašajika ruchi.

<sup>70</sup> O rašaja, o Leviti the varesave le Izraelitendar ačhile te bešel andro Jeruzalem; o lavutara, o chramoskre stražnika the o služobnika andre peskre fori; a okla Izraeliti gele te bešel andre ola fori, kaj bešenas lengre phure dada.

### 3

#### *O oltaris pale ačhado*

<sup>1</sup> Sar sas pašes o eftato čhon, akor sar o Izraeliti imar bešenas andre peskre fori, zgele pes jekhetane savore manuša andro Jeruzalem.

<sup>2</sup> O Ješua, le Jocadakoskro čhavo, peskre phralenca le rašajenca the o Zerubabel, le Šealtieloskro čhavo, peskre phralenca chudle pale te ačhavel o oltaris le Izraeloskre Devleske,

hoj te obetinen upre o labarde obeti, avke sar hin pisimen andro zakonos le Devleskre muršeskro le Mojžišoskro.

<sup>3</sup> O oltaris ačhade pre oda than, kaj angloda ačhelas, kajte daranas le manušendar, save bešenas pašal lende. Avke chudle pale te anel tosara the rači o labarde obeti le RAJESKE.

<sup>4</sup> Oslavinenas the o inepos le Stankengro, avke sar hin pisimen, a sako džives anenas ajci labarde obeti, keci sas dino pre oda džives.

<sup>5</sup> A paloda anenas the o sakodživeseskro labarde obeti, o obeti pro inepos le Neve čhoneskro the pre dojekh beršeskro inepos le RAJESKRO, a mek the ola obeti, so obetinenas korkore pestar le RAJESKE.

<sup>6</sup> Andro ešebno džives le eftate čhoneskro chudle te anel le RAJESKE o labarde obeti, kajte mek na sas zathode o chramoskre zakladi.

### *O chramoskre zakladi ačhade*

<sup>7</sup> O manuša dine o love le tesarengre the le muršenge, save kerenas le barenca. Dine o chaben, o pijiben the o olejos le Sidončanenge the le Tirčanenge, hoj te anen o cedroskre kašta la lođaha andral o Libanon ke Joppa, avke sar lenge domukla o perziko kralis Kiros.

<sup>8</sup> E buči pro Chramos chudle te kerel andro dujto berš andro dujto čhon, sar avle pale andro Jeruzalem. Sas oda kala džene: o Zerubabel, le Šealtieloskro čhavo, the o Ješua, le Jocadakoskro čhavo, peskre dženenca, le rašajenca, le Levitenca the olenca, save avle andral o Babilon. Ačhade le Leviten, save sas

phureder sar biš (20) berš, upral o manuša, save kerenas e buči pro Chramos le RAJESKRO.

<sup>9</sup> Avke sas upral ola džene, save kerenas o Chramos, o Ješua, leskre čhave the phrala, o Kadmiel peskre čhavenca andral e famelija le Hodavijoskri the le Chenadadoskre čhave peskre čhavenca the phralenca, bo sas Leviti.

<sup>10</sup> Sar chudle te kerel o chramoskre zakladi, o rašaja ačhenas urde andro ruchi le trubenca pre peskre thana a o Leviti andral le Asafoskri famelija ačhenas pre peskre thana le cimbalmenca, hoj te lašaren le RAJES, avke sar diña avri o krališ David.

<sup>11</sup> Lašarenas le giľenca le RAJES a palikerenas leske:

„O RAJ hino lačo,  
leskro jileskeriben upral o Izrael likerel pro furt.“

Savore manuša igen radisaľonas bara vikaha. Lašarenas le RAJES, hoj pes chudňa e buči pro chramoskre zakladi.

<sup>12</sup> Ale o phureder rašaja, o Leviti the o famelijengre vodci, save angloda dikhle o purano Chramos, igen rovenas, sar dikhle, hoj pale keren o chramoskre zakladi. Ale aver džene radisaľonas bara vikaha,

<sup>13</sup> hoj ņiko našti rozprindžarelas e radišagoskri vika le rovibnastar, bo o manuša kerenas igen bari vika a šundolas len imar dural.

## 4

*O ņeprijateľa kamen te zaáčhavel e buči pro*



## *Chramos*

<sup>1</sup> Sar šunde le Judengre the le Benjam-inčanengre nepřijatela, hoj ola, ko sas zaile andro Babilon, avle pale a ačhaven o Chramos le RAJESKE, le Izraeloskre Devleske,

<sup>2</sup> avle ko Zerubabel the ko famelijengre vodci a phende lenge: „Kamas the amen te ačhavel tumenca, bo the amen lašaras tumare Devles, avke sar tumen. Amen leske obetinas ole dživesestar, sar amen kade anda o asiriko kralis Esar-Chadon.“

<sup>3</sup> Ale o Zerubabel, o Ješua the o aver vodci andral o izraelika fameliji lenge phende: „Tumen the amen naši ačhavas jekhetane o Chramos amare Devleske. Ča amen korkore les mušinas te ačhavel le RAJESKE, le Izraeloskre Devleske, avke sar amenge prikazinda o perziko kralis Kiros.“

<sup>4</sup> Avke o manuša andral odi phuv kerenas savoro pre oda, hoj le manušen andral e Judsko te keren tele la bučatar. Daravenas len avri, hoj te na ačhaven o Chramos.

<sup>5</sup> Mek ke oda peske počoral počinenas le bare uradņiken, hoj te zničinen lengri buči. Kada kerenas, sar kralinelas o perziko kralis Kiros, dži akor, medik na kralinelas o kralis Darius.

## *O nepřijatela pisinen lil le kraliske*

<sup>6</sup> Sar chudņa te kralinel o kralis Ahasver, pisinde lil, andre savo namištes vakerenas pro manuša andral e Judsko the andral o Jeruzalem.

<sup>7</sup> A sar kralinelas o Artaxerxes, pisinde leske lil o Bišlam, Mitredat, o Tabeel the okla manuša,

save lenca kerenas e buči. Oda lil sas pisimen andre aramejiko čhib a kampelas les te prethovel.

<sup>8</sup> O uradnikos Rechum the o pisaris Šimšaj pisinde le kraliske Artaxerxesoske kajso lil pro Jeruzalem:

<sup>9</sup> „O uradnikos Rechum, o pisaris Šimšaj the okla lengre manuša, o sudci, o uradnika the o vodci upral o manuša andral o Uruk, Babilon the o Elamiti andro Šušan

<sup>10</sup> a mek aver narodi, saven o baro the slavno Asnapar zaila a thoda te bešel andro samarijika fori the andre provincija pal o pañi Euftrat.“

<sup>11</sup> Andre oda lil sas pisimen:

Le kraliske Artaxerxesoske:

Amen sam tire služobnika, andral e provincija pal o Euftrat.

<sup>12</sup> Das te džanel le kraliske, hoj o Židi, save avle tutar kade te bešel andro Jeruzalem, chudle pale te ačhavel kada zoralo a nalačo foros a prikeren pašal leste o muri the o zakladi.

<sup>13</sup> Mi džanel olestar o kralis, hoj sar ela kada foros ačhado a leskre zorale muri prikerde, preačhena tuke te počinel o clo the o dañe a avke chibalinena o love andre kraliko pokladnica.

<sup>14</sup> A vašoda, hoj pačivalones služinas le kraliske, našti dikhas pre oda, sar keren namištes le kraliske, a vašoda akana le kraliske kada das te džanel.

<sup>15</sup> Bo te rodeha andro zvitki le kralengre, dodžaneha tut, hoj o Jeruzalem pes vzburielas le kralenge, kerelas lenge the lengre phuvenge pharipena a o manuša andre kada foros imar čirlastar kerenas vzburi, a vašoda sas oda foros zničimen.

<sup>16</sup> Avke das te džanel le kraliske, hoj sar ela kada foros ačhado a leskre muri prikerde, na ela tut zor upral e provincija Euftrat.

<sup>17</sup> O kralis odphenda kada:

Le uradnikoske Rechumoske, le pisariske Šimšajoske the ole manušenge, save bešenas andre Samarija the andre provincija pal o Euftrat:

„Smirom tumenge.

<sup>18</sup> Oda lil, so mange bičhadan, sas prethodo a pregendo angle mande.

<sup>19</sup> Me prikazindom, hoj te roden andro zvitki, a on arakhle, hoj oda foros pes čirlastar vzburielas le kralenge, o manuša andre leste kerenas pharipena the vzburi

<sup>20</sup> a hoj upral o Jeruzalem vladņinenas zorale krala, save ovladņinenas savore phuva pal o paņi Euftrat, a počinelas pes lenge o daņe the o clo.

<sup>21</sup> Akana den avri o prikazis, hoj ola murša te preačhen te ačhavel o foros, a te na chuden pale te ačhavel, medik me na dava aver prikazis.

<sup>22</sup> Zaačhaven oda takoj, hoj mange le kraliske te na keren goreder.“

<sup>23</sup> Sar le kraliskro l'il pregende anglo Rechum, šimšaj the angle lengre manuša, on sidarde ko Židi andro Jeruzalem a andro nav le kraliskro lenge zoraha rozkazinde te preačhel te kerel e buči.

### *E buči pro Chramos zaačhadi*

<sup>24</sup> Avke e buči pro Chramos le Devleskro andro Jeruzalem sas zaačhadi, medik na kralinelas dujto berš o kralis Darius andre Perzija.

## 5

### *O manuša pale ačhaven o Chramos*

<sup>1</sup> O prorokos Aggeus the o Zacharijaš, le Idoskro čhavo, prorokinenas le Židenge andre Judsko the andro Jeruzalem andro nav le Izraeloskre Devleskro, savo sas upral lende.

<sup>2</sup> Akor chudle o Zerubabel, o čhavo le Šealtieloskro, the o Ješua, o čhavo le Jocardakoskro, te ačhavel o Chramos le Devleskro andro Jeruzalem. Sas lenca the le Devleskre proroka a pomožinenas lenge.

<sup>3</sup> Andre oda časos ke lende avla o Tatenaj, savo sas guverneris andro Zapadno Euftrat, o Šetar-Bozenaj the ola, save jekhetane lenca kerenas, a phučle lendar: „Ko tumenge domukla te ačhavel kada Chramos a te prikerel kala muri?“

<sup>4</sup> A mek lendar phučle: „Sar pes vičinen o murša, save keran e buči pro Chramos?“

<sup>5</sup> Ale o Del chrañinelas le židovike vodcen, avke lenge na zaačhade te kerel e buči, medik

na pisinde le kraliske Darioske a medik lenge ov na odphendá pale.

### *O líl prekal o Darius*

<sup>6</sup> Kada líl pisinde o guverneris Tatenaj, Šetar-Bozenaj, lengre murša the o vodci andro Zapadno Euftrat a bičhade le kraliske Darioske.

<sup>7</sup> Andre sas pisimen:

Le kraliske Darioske:

Smirom tuke, kralína!

<sup>8</sup> Mi džanel o kralis pal kada, hoj amen gelam andre judsko phuv ko Chramos le bare Devleskro. On les ačhaven le bare barune kvadrendar a thoven o kaštune hranoli andro fali. Dojekh lendar kerel pačivalones e buči pro Chramos a džal lenge mištes.

<sup>9</sup> Akor phučlam le vodcendar: „Ko tumenge domukla te ačhavel kada Chramos a te prikerel kala muri?“

<sup>10</sup> Phučlam lendar the pal lengre nava, hoj tuke te das te džanel, a pisindam o nava le muršengre, ko hine lengre vodci.

<sup>11</sup> On amenge odphende: „Amen sam služobníka le Devleskre, savo hino Del pro ňebos the pre phuv, a ačhavas kada Chramos, so sas ačhado imar anglo but berša. Ačhavelas les a dokerďa les o baro kralis le Izraeloskro.

<sup>12</sup> Ale vaš oda, hoj amare phure dada anenas andre choľi le Devles pro ňebos, diňa len andro vasta le babiloňike kraliske Nebukadnecaroske andral o Chaldej. Ov zňičinda kada Chramos

a odligenda le manušen sar zajatcen andro Babilon.

<sup>13</sup> Ale o kralis Kiros, sar kralinelas ešebno berš andro Babilon, prikazinda, hoj pes pale te ačhavel o Chramos le Devleskro.

<sup>14</sup> A mek paš oda visarda pale o somnakune the rupune veci, so o Nebukadnecar iła andral o Chramos andro Jeruzalem a thođa andre peskro čhramos andro Babilon. O Kiros diña kala veci le Šešbacaroske, saves ačhađa guverneriske upral e Judsko

<sup>15</sup> a phenda leske: ‚Le kala veci a lidža len andro Chramos andro Jeruzalem! A mi ačhavel pes o Chramos le Devleskro pale pre oda than, kaj sas ešebnovar ačhado.‘

<sup>16</sup> Palis oda Šešbacar geła a ačhađa o zakladi pro Chramos le Devleskro andro Jeruzalem. Ole dživesestar pes ačhavel dži akana, ale mek nane dokerdo.“

<sup>17</sup> Akana, te oda hin le kraliske pre dzeka, mi rodel pes andro zvitki le babiloņike kralengre, či o Kiros diña avri, hoj kada Chramos andro Jeruzalem pes šaj pale ačhavel. Mi del amenge o kralis te džanel, sar pes rozhodņinda.

## 6

### *O Darius arakhel o zvitkos*

<sup>1</sup> Avke o kralis Darius prikazinda, hoj te roden andro zvitki le babiloņike kralengre, či o Kiros diña avri, hoj o Chramos andro Jeruzalem pes šaj pale ačhavel.

<sup>2</sup> A andro palacis andro foros Ekbatana andre provincija Medija arakhle jekh zvitkos, andre savo sas pisimen kada:

<sup>3</sup> O kralis Kiros, sar kralinelas ešebno berš, prikazinda, hoj pale te ačhaven o Chramos le Devleskro andro Jeruzalem:

Mi ačhavel pes kada Chramos sar than, pre savo pes anela o chabeneskre the o labarde obeti. O Chramos mi el bišuefta (27) metri učo the bišuefta metri buchlo.

<sup>4</sup> O muri mi en ačhade kavke – trin šori barune kvadri a jekh šoros le kaštetar. Savoro mi el počimen andral le kraliskri pokladnica.

<sup>5</sup> A mi den pale the o somnakune the o rupune veci, so o kralis Nebukadnecar iľa andral o Chramos le Jeruzalemoskro a odligenda andro Babilon. Ola veci mi en thode pale pre peskro than, andro Jeruzalem, andro Chramos le Devleskro!

### *O Darius domukel e buči pro Chramos*

<sup>6</sup> Paľis o Darius diňa te phenel le Tatenajoske, savo sas uradňikos andro Zapadno Euftrat, le Šetar-Bozenajoske, olenge, save jekhetane lenca kerenas, the le vodcenge pašal o paňi Euftrat:

Džan odarik het!

<sup>7</sup> Muken len, mi keran e buči pro Chramos le Devleskro! O židoviko guverneris the lengre vodci mi ačhaven o Chramos le Devleskro ode, kaj sas anġloda.

<sup>8</sup> Kada hin miro prikazis, so te keran ole Židengre vodcenca, save keran e buči pro Chramos le Devleskro.

Mi el lenge savoro počimen le kraliskra pokladňatar the le daňendar andral o Zapadno Eufkrat, hoj e buči te na zaačhel,

<sup>9</sup> a sako džives furt te del le rašajenge andro Jeruzalem savoro, so lenge kampela: terne biken, bakroren the bakren pre labardi obeta le Devleske, savo hino pro ņebos, abo o zrnos, lon, mol the olejso,

<sup>10</sup> hoj te anen le ņeboskre Devleske ajsje obeti, so leske ena pre dzeka, a te modlinen pes vaš oda, hoj le kralis the leskre čhaven te el bachtalo dživipen.

<sup>11</sup> A mek prikazinav: te vareko tumendar na dolikerela mire lava, cirdela pes avri andral leskro kher o hranolos, so likerel calo kher. Palis pre oda hranolos les thovena upre a primarena. A leskro kher ela zničimen sar jekh kopa šmeci.

<sup>12</sup> O Del, savo peske kidňa avri o Jeruzalem, hoj ode te el lašardo, mi zničinel savore kralen the naroden, save na kamena te dolikerel mire lava a kamena te zničinel o Chramos andro Jeruzalem.

Me o Darius dav avri kada prikazis a mušinel pes te dolikerel!

### *O Chramos hino dokerdo*

<sup>13</sup> Akor o Tatenaj, o guverneris andro Zapadno Eufkrat, o Šetar-Bozenaj the lengre murša kerde savoro avke, sar lenge prikazinda o kralis Darius.

<sup>14</sup> Avke o židovika vodci šaj dureder ačhavenas o Chramos a e buči lenge barolas tel lengre vasta, avke sar prorokinde o proroka



Aggeus the Zacharijaš, o čhavo le Idoskro. O Chramos dokerde avke, sar prikazinda le Izraeloskro Del a sar prikazinde o perzika kraľa: o Kiros, o Darius the o Artaxerxes.

<sup>15</sup> O Chramos le Devleskro dokerde trito džives andro čhon Adar andro šovto berš, sar kralinelas o Darius.

<sup>16</sup> Palis o Izraeliti, o rašaja, o Leviti the okla, ko avle andral o Babilon, kaj sas zaile, oslavinenas radišagoha, hoj pošvecinde o Chramos le Devleskro.

<sup>17</sup> Sar pošvecinenas o Chramos, obetinde šel (100) biken, duj šel (200) bakren the štar šel (400) terne bakroren the dešuduj (12) capen vaš o bini cale Izraeloskre a oda jekh capos vaš jekh izraeliko kmeňos.

<sup>18</sup> Palis ačhade andre le chramoskri služba andro Jeruzalem le rašajen the Leviten, avke sar hin pisimen andre le Mojžišoskro zvitkos.

### *E Patrađi*

<sup>19</sup> Akor ola manuša, so avle pale andral o Babilon, oslavinenas e Patrađi pro dešuštarto (14.) džives andro ešebno čhon.

<sup>20</sup> O rašaja the o Leviti pes obžuzarde, savore sas žuže a avke o Leviti šaj murdarenas le Patrađakre bakrores prekal o manuša, save avle pale, prekal o aver rašaja the prekal peste.

<sup>21</sup> Palis o Izraeliti chanaš le Patrađakre bakrores jekhetane ole manušenca, so sas zaile andro Babilon, the savorenca, ko omukle o džungipen, savo kerenas o narodi ola phuvakre, a pridine pes ko Izraeliti, hoj te roden le RAJES, le Izraeloskre Devles.

22 Efta dživesa savore Izraeliti oslavinenas e Patradi, o inepos le Marengro bi o Kvasos. O RAJ len pherdžarda le radišagoha, bo thoda pro jilo le asirike kraliske, hoj lenge te pomožinel andre buči pro Chramos le Izraeloskre Devleske.

## 7

### *Le Ezdrašoskro rodokmeños*

<sup>1</sup> Pal kada savoro, andro časos, sar kralinelas o perziko kralis o Artaxerxes, avla o rašaj Ezdraš andral o Babilon andro Jeruzalem. Kada hin le Ezdrašoskro rodokmeños: Leskro dad sas o Serajah, leskro o Azariah, leskro o Chilkijah,

<sup>2</sup> leskro o Šalum, leskro o Cadok, leskro o Achitub,

<sup>3</sup> leskro o Amariah, leskro o Azariah, leskro o Merajot,

<sup>4</sup> leskro o Zerachijah, leskro o Uzi, leskro o Buki,

<sup>5</sup> leskro o Abišuas, leskro o Pinchas, leskro o Eleazar a leskro o Aron, savo sas nekbareder rašaj.

### *O Ezdraš avel andro Jeruzalem*

<sup>6</sup> O Ezdraš avla avri andral o Babilon a gela andro Jeruzalem. Sas pisaris, savo mištes džanelas o zakonos le Mojžišoskro, so diña o RAJ, o Del le Izraeloskro. O kralis les delas savoro, so lestar mangelas, bo o vast le RAJESKRO, leskre Devleskro, sas upral leste.

<sup>7</sup> Leha avenas andro Jeruzalem vajkeci Izraeliti jekhetane le rašajenca, Levitenca, lavutarenca, stražņikenca the le chramoskre služobņikenca.

Oda pes ačila, sar o Artaxerxes kralinelas andre Perzija eftato berš.

<sup>8</sup> A o Ezdraš dogela andro Jeruzalem andro pandžto čhon ole eftate beršeskro.

<sup>9</sup> Ešebno džives andro ešebno čhon odgela andral o Babilon a andro ešebno džives andro pandžto čhon dogela andro Jeruzalem, bo o Del upral leste likerelas peskro vast.

<sup>10</sup> O Ezdraš sas cale jileha oddino te sik'ol o Zakonos le RAJESKRO, te dolikerel les a te sikavel le Izraeliten o prikazi the o zakoni.

### *Le kraliskro lil le Ezdrašoske*

<sup>11</sup> Kada hin o lil, so odpisinda o kralis Artaxerxes le Ezdrašoske, savo sas zakoňikos the rašaj a savo džanelas mištes o zakonos le RAJESKRO the leskre prikazi prekal o Izrael:

<sup>12</sup> Me, o Artaxerxes, o kralis upral savore kraľa.

Le rašaske Ezdrašoske, savo sikavel o zakonos le ņboskre Devleskro:

Smirom tumenge!

<sup>13</sup> Me dav avri o prikazis, hoj šaj tuha džal sako le Izraelitendar andral miro krališagos, le rašajendar the le Levitendar, ko tuha kamela te džal andro Jeruzalem.

<sup>14</sup> O kralis jekhetane leskre efta radcenca tut bičhavel, hoj te dikhes, či dolikeren andro Jeruzalem the andre Judsko o zakonos tire Devleskro, so hino tute andro vasta.

<sup>15</sup> Le tuha o rup the o somnakaj, so me the mire radci das sar dari le Izraeloskre Devleske, saveskro Chramos hin andro Jeruzalem,

<sup>16</sup> a savoro rup the somnakaj, so skideha andre calí provincija Babilon, a the o dari, so dena o manuša the o rašaja prekal o Chramos lengre Devleskro andro Jeruzalem.

<sup>17</sup> Dodikh mištes pre oda, hoj vaš kala love te cines biken, bakren, bakroren, zrnos the mol a obetin len pro oltaris andro Chramos tumare Devleskro andro Jeruzalem!

<sup>18</sup> Tu tire manušenca šaj keren oda, so kamen le rupoha the somnakaha, so ačhela. Keren oda, so kamel tumaro Del.

<sup>19</sup> Lidža anglo Del andro Jeruzalem o nadobi, so tuke sas dine pre služba andro Chramos tumare Devleskro.

<sup>20</sup> A so mek kampela andro Chramos tire Devleskro, počin andral le kraliskri pokladňa.

<sup>21</sup> Me o kralis Artaxerxes oleha prikazinan savore pokladňikenge andre provincija Zapadno Euftrat, hoj te den le rašaske Ezdrašoske, savo mištes džanel o zakonos le űeboskre Devleskro, savoro, so tumendar mangela:

<sup>22</sup> šaj den dži 3,4 toni\* rup, 10 toni† zrnos, 2 000 litri‡ mol, 2 000 litri§ olivovo olejos a lon keci kampela.

<sup>23</sup> Kampel te kerel savoro, so kamel o Del le űeboskro prekal peskro Chramos, hoj leskri

---

\* 7:22 Oda hin 100 talenti. † 7:22 Oda hin 100 kori. ‡ 7:22 Oda hin 100 bati. § 7:22 Oda hin 100 bati.

choli te na avel pre miro krališagos aňi pre mire čhave.

<sup>24</sup> A mek tumenge phenav, hoj űiko naűi mangel űisave daňe abo clo le raűajendar, le Levitendar, le lavutarendar, le straűňikendar, le chramoskre sluűobňikendar aňi avre robotňikendar andral kada Chramos le Devleskro.

<sup>25</sup> Tu, Ezdraű, ker godaha avke, sar tut o Del diňa, ačhav sudcen the uradňiken, save miűtes dűanen o zakonos tire Devleskro a mi lidűan le manuűen andro Zapadno Euftrat, a ko na dűanela o zakonos, oles sikaven!

<sup>26</sup> Dojekh, ko na űunela o zakonos tire Devleskro abo o zakonos le kraliskro, mi el takoj odsudzimen pro meriben, abo mi el avritradlo andral odi phuv, abo mi el čhido andre bertena, abo pes lestar mi lel savoro, so les hin!

### *O Ezdraű laűarel le Devles*

<sup>27</sup> Mi el barardo o RAJ, o Del amare dadengro, savo thođa pro jilo le kraliske, hoj kavke te del pačiv le RAJESKRE Chramos andro Jeruzalem.

<sup>28</sup> O RAJ avke kerđa, hoj o kralis, leskre radci the savore vodci mange presikade o jileskeriben. Le Devleskro vast man zoralarda a me prevakerđom le Izraeloskre vodcen, hoj te aven manca upre andro Jeruzalem.

## 8

### *O manuűa, save avle le Ezdraűoha*

<sup>1</sup> Kala hin o vodci le famelijengre, so sas andro zajatje andro Babilon a avle pale le Ezraűoha andro Jeruzalem, sar kralinelas o Artaxerxes:

- <sup>2</sup> Andral e famelija le Pinchasoskri: o Geršom; andral e famelija le Itamariskri: o Daniel; andral e famelija le Davidoskri: o Chatuš,
- <sup>3</sup> o čhavo le Šechanioskro; andral e famelija le Parošoskri: o Zecharijah, saveha sas zapisimen 150 murša;
- <sup>4</sup> andral e famelija le Pachat-Moaboskri: o Eljehoenaj, o čhavo le Zerachijoskro, a leha 200 murša;
- <sup>5</sup> andral e famelija le Zatuoskri: o Šechaniah, o čhavo le Jachazieloskro, a leha 300 murša;
- <sup>6</sup> andral e famelija le Adinoskri: o Ebed, o čhavo le Jonatanoskro, a leha 50 murša;
- <sup>7</sup> andral e famelija le Elamoskri: o Ješajah, o čhavo le Atalijoskro, a leha 70 murša;
- <sup>8</sup> andral e famelija le Šefatjoskri: o Zebadijah, o čhavo le Michaeloskro, a leha 80 murša;
- <sup>9</sup> andral e famelija le Joaboskri: o Obadiah, o čhavo le Jechieloskro, a leha 218 murša;
- <sup>10</sup> andral e famelija le Baniskri: o Šelomit, o čhavo le Josifijoskro, a leha 160 murša;
- <sup>11</sup> andral e famelija le Bebajoskri: o Zecharijah, o čhavo le Bebajoskro, a leha 28 murša;
- <sup>12</sup> andral e famelija le Azgadoskri: o Jochanan, o čhavo le Hakatanoskro, a leha 110 murša;
- <sup>13</sup> a posledna sas andral le Adonikamoskri famelija: o Elifelet, o Jeiel the o Šemajah a lenca 60 murša;
- <sup>14</sup> andral e famelija le Bigvajoskri: o Utaj the o Zabud a lenca 70 murša.

*O služobníka prekal o Chramos*

<sup>15</sup> Zvičindom savoren paš o paňi, so džal andro foros Ahava, a ačhilam ode trin dživesa. Rozdikhľom man maškar o manuša the rašaja, ale na arakhľom maškar lende aňi jekhes Levitas.

<sup>16</sup> Akor vičindom paš ma le vodcen le Eliezer, le Ariel, le Šemajah, le Elnatan, le Jarib, le Elnatan, le Natan, le Zecharijah. Vičindom the le Mešulam a mek le Jojarib the le Elnatan\*, save sikavenas o zakonos.

<sup>17</sup> Prikazindom lenge, hoj te džan ko Ido, savo sas vodcas andre Kasifija, a te mangel lestar the okle Levitendar, le chramoskre služobňikendar, hoj te bičhaven ke amende muršen pre služba andro Chramos le Devleskro.

<sup>18</sup> Vašoda, bo le Devleskro lačho vast sas pre amende, bičhade amenge le Šerebiah, le godavere muršes, savo sas Levitas andral le Machlioskri famelija, leskre dešuochto (18) čhavenca the phralenca.

<sup>19</sup> Bičhade mek le Chašabiah the le Ješajah le biš (20) phralenca andral le Merariskri famelija,

<sup>20</sup> the 220 chramoskre služobňiken, saven angloda o David the o vodci dine le Levitenge, hoj lenge te pomožinen andre služba. Kala savore sas zapisimen pal peskre nava.

### *O Ezdraš the o manuša pes poscinen a modľinen*

<sup>21</sup> Palis paš o paňi Ahava diňom avri o postos, hoj pes te pokorinas anglal amaro Del a te mangas lestar bachtalo drom, hoj te chraňinel

---

\* **8:16** Trine muršen sas nav Elnatan.

amen, amare čhaven the amaro barvalipen, sar džaha andro Jeruzalem.

<sup>22</sup> Ladžavas man te mangel le kralistar slugaden the muršen pro graja, hoj amen te chrañinen le ñeprijatelendar, sar džaha le dromeha. Se phendam le kraliske: „O vast amare Devleskro hino upral savore, ko les roden, ale leskri bari choľi hiñi pre savore, ko les omuken.“

<sup>23</sup> Avke pes vaš oda poscinahas a mangahas amare Devles a ov amen šunđa avri.

<sup>24</sup> Akor mange kidñom avri dešduje (12) bare rašajen, the le Šerebiah, le Chašabiah the mek deše avren.

<sup>25</sup> Avke lenge odvažindom o rup, somnakaj, o nadobi prekal o Chramos, so dine o kralis, leskre radci, o vodci the savore Izraeliti prekal o Chramos le Devleskro.

<sup>26-27</sup> Savoro ode sas: biš the duj (22) toni rup; šel (100) rupune nadobi, so važinenas eftavardeš (70) kili; 3,4 toni somnakaj; biš somnakune čare, so važinenas buter sar ochto kili; a duj bronzune nadobi, so sas ajse vzacna sar somnakaj.

<sup>28</sup> Phendom lenge: „Tumen san pošvecimen prekal o RAJ the kala veci a o rup le somnakaha hino sar e obeta le RAJESKE, tumare dadengre Devleske.

<sup>29</sup> Starinen tumen pal oda a stražinen oda, medik len na odvažinena a na dena le rašajenge, le Levitenge the le izraelike vodcenge andro Chramos le RAJESKRO andro Jeruzalem.“

<sup>30</sup> Avke o rašaja the o Leviti lendar ile o rup,



somnakaj the ola nadobi, hoj len te odlidžan andro Jeruzalem, andro Chramos le Devleskro.

### *Doaven andro Jeruzalem*

<sup>31</sup> Andro dešudujto džives andro ešebno čhon odgelam le pañestar Ahava a džahas andro Jeruzalem. Le Devleskro vast sas upral amende. Ov amen chrañinelas pro drom le ñeprijatelendar the le zbujñikendar.

<sup>32</sup> Sar doavlam andro Jeruzalem, ačhilam ode trin dživesa.

<sup>33</sup> Pro štarto džives gelam andro Chramos a odvažindam o rup, o somnakaj the o nadobi andro Chramos le rašaske, le Meremotoske, saveske sas dad o rašaj Urijah. Sas paš oda o Eleazar, le Pinchasoskro čhavo, the o duj Leviti o Jozabad, le Ješuaskro čhavo, the o Noadiah, le Binujoskro čhavo.

<sup>34</sup> Savoro pes zgenda a važinda. E vaha dojekha vecatar sas zapisimen.

<sup>35</sup> Palis o manuša, save avle andral o Babilon, ande o labarde obeti le Izraeloskre Devleske. Obetinde dešuduj biken vaš calo Izrael, eñavardeš the šov (96) bakren, eftavardeš the ehta (77) terne bakroren the dešuduj capen sar obeta vaš lengre bini. Kada savoro sas obetimen le RAJESKE sar labardi obeta.

<sup>36</sup> Palis dine le kraliskre lila le uradñikenge the le guvernerenge andre provincija Zapadno Euftrat. Avke on pomožinenas le manušenge a denas oda, so kampilas pro Chramos le Devleskro.

## 9

*O romňija andral aver narodi*

<sup>1</sup> Sar pes kada savoro imar kerđa, avle ke ma o izraelika vodci a phende: „O Izraeliti aňi o rašaja aňi o Leviti pes na oddeline kale narodendar: le Amončanendar, le Moabčanendar, le Egiptanendar, le Kanaančanendar, le Chetitandendar, le Perizejendar, le Jebusejendar the le Amorejčanendar; a keren ola džungale veci, so keren the on.

<sup>2</sup> Ale ile peske romňijen andral kala narodi, the peskre čhavage, a avke mišinde le Devleskre svete manušen le cudzincenca. A amare vodci the anglune manuša kada binos kerde ešebna.“

<sup>3</sup> Sar oda šundom, čhingerđom pre ma o ruchos the o plaštos a cirdavas mange o bala pal o šero the pal e brada. Bešlom mange a somas olestar igen zničimen.

<sup>4</sup> Akor pes zgele ke ma savore manuša, so daranas le Izraeloskre Devleskre lavestar vaš oda binos, so kerde o Židi, save avle pale andral o zajatje. Me ode bešavas igen strapimen dži e račakri obeta.

*O Ezdraš pes modlīnel*

<sup>5</sup> Paš e račakri obeta uštilom pal oda than, kaj man pokorindom a le rozčhingerde ruchoha the plaštoha pelom pro khoča, hazdňom upre o vasta a mangavas le RAJES, mire Devles:

<sup>6</sup> „Devla miro, igen man ladžav te hazdel miro muj upre ke tu, miro Del, bo amare bini amen prebararde a amaro nalačhipen imar hino dži paš o ņebos.

<sup>7</sup> Akorestar, sar sas amare phure dada, dži adadžives kerahas baro nalačhipen. Vaš amare nalačhipena samas amen, amare kraľa the amare rašaja dine andro vasta avre kralenge: On varesaven amendar murdarde, oklen ile sar zajatcen het andral amari phuv, čorde amaro barvalipen a kerde amenge ladž, avke sar oda hin the adadžives.

<sup>8</sup> Akana, RAJEJA, Devla amaro, tu salas pro frima časos ke amende jileskro a mukľal varekas amendar te avel pale andral o Babilon a te dživel andro smirom andre kada sveto foroš. Tu amen cirdňal avri andral o otroctvos a diňal amen nevo dživipen.

<sup>9</sup> A kajte sam otroka, tu amen na omukľal andre amaro otroctvos. Ale kerdal, hoj o perzika kraľa te aven ke amende jileskre a te muken amen te džal te dživel nevo dživipen a te ačhavel pale o Chramos, so sas rozburimen, a tu amen diňal andre Judsko the andro Jeruzalem o muros, so amen ochraňinel.

<sup>10</sup> Ale akana, so šaj tuke phenas pal kada savoro, so pes ačhiľa, Devla amaro? Se omukľam tire prikazaňja,

<sup>11</sup> save amenge diňal prekal tire služobňika, prekal o proroka, sar phendal: ‚E phuv, andre savi džan, hoj tumenge la te zalen, hiňi melardi, bo o narodi, save andre bešen, la pherdžarde le nalačhipnaha the le džungipnaha pal jekh agor dži pre aver.

<sup>12</sup> Vašoda ma den tumare čhajen romňenge lengre čhavenge, aňi ma len tumare čhavenge lengre čhajen! Šoha ma roden lengro lačhipen

the smirom, hoj te aven zorale a te chan o lačhipen la phuvakro a te muken la tumare čhavenge sar večno dedictvos.'

<sup>13</sup> Pal kada savoro, so avla pre amende vaš amare bini the vaš amare nalače skutki, tu Devla amaro, amen potrestindal frimeder, sar peske zaslužindam vaš amaro nalačhipen. A muklal amendar kale sikra manušen te dživel.

<sup>14</sup> Či akana pale na dolikeraha tire prikazaňja a laha peske romňijen andral ola nalače narodi? Se te ada keraha, či pre amende na cholisaloha avke, hoj amen savoren zničineha a na mukeha ňikas te dživel?

<sup>15</sup> RAJEJA, Devla le Izraeloskro, tu sal čačipnaskro! Adadžives sam kade, ča ajci, keci pes zachraňindam. Dikh, ačas angle tu andre amari bari vina a ňiko amendar našti angle tu obačhel.“

## 10

### *O Izraeliti premuken le cudze romňijen*

<sup>1</sup> Medik o Ezdraš pašlolas le mujeha pre phuv anglo Chramos le Devleskro, rovibnaha pes modlinelas a phenelas avri o bini, avle ke leste but Izraeliti: o murša, o džuvla the o čhave a igen rovenas.

<sup>2</sup> Avke o Šechaniah, o čhavo le Jechieloskro andral le Elamoskri famelija, phendā le Ezdrašoske: „Kerđam binos angle amaro Del oleha, hoj peske ilam romňijen andral aver narodi, save kade bešen, ale the avke mek hin prekal o Izrael e nađej.

<sup>3</sup> Akana aven phandas e zmluva angle amaro Del, hoj bičhavaha het savore ole romñijen the lengre čhaven, sar oda tu, raja, the ola, ko daran amare Devleskre prikazañjendar, phenena. Mi kerel pes oda avke, sar hin pisimen andro zakonos.

<sup>4</sup> Ušti, bo tu ada mušines te kerel. Amen tuke pomožinaha, ča muk tut andre oda bi e dar!“

<sup>5</sup> Avke o Ezdraš uštila a phenda le anglune rašajenge, le Levitenge the savore Izraelitenge, hoj te len vera, hoj dolikerena oda lav. A on ile vera.

<sup>6</sup> Palis o Ezdraš uštila upre pal oda than anglo Chramos a geła andro kher le Jochananoskro, le Eljašiboskre dadeskro, hoj ode te presovel. Ov ode na čala chaben aňi na piła paňi, bo leske sas pharo vaš o binos olengro, ko avle pale andral o Babilon.

<sup>7</sup> A palis dine te džanel pal cali Judsko the pal calo Jeruzalem, hoj pes andro Jeruzalem te zdžan savore manuša, so sas ile andro zajatje andro Babilon.

<sup>8</sup> Dine avri, hoj sako, ko ode na avela tel o trin džives, (avke sar pes dovakerde o bare manuša the o vodci,) lela pes leske calo leskro barvalipen a imar pes les na rachinela sar jekh amendar.

<sup>9</sup> Avke pes tel o trin džives andro Jeruzalem zgele savore manuša andral e Judsko the savore manuša andral o kmeňos Benjamin. Sas oda pro bišto (20.) džives andro eňato čon. Savore manuša bešenias pre dvora anglo Chramos a izdranas olestar, so sas phendo, the le bare brišindestar.

<sup>10</sup> Akor uštila o rašaj Ezdraš a phenda lenge: „Kerđan binos oleha, hoj tumenge ilan romņijen andral o cudzo narodos, a oleha rozbarardan e vina le Izraeloskri.

<sup>11</sup> Akana viznavinen tumare bini le RAJESKE, tumare dadengre Devleske, a keren oda, so ov kamel. Oddelinen tumen le narodendar, so kade bešen, a omuken tumare cudze romņijen.“

<sup>12</sup> A savore manuša, so pes ode zgele, zoraha phende: „Čačipen tut hin! Mušinas te kerel oda, so amenge phenda!“

<sup>13</sup> A mek phende: „Sam kade but džene a igen del o brišind. Našti ačas kade avri. Kada hin vareso, so pes na del te kerel tel o jekh džives abo tel o duj, bo but džene amendar sam andre oda binos.

<sup>14</sup> Vašoda mangas, hoj amare vodci te ačhen andro Jeruzalem a te postarinen pes pal kadi veca. A sako, kas hin romņi andral aver narodos, mi avel pre oda časos, so ela dino avri, jekhetane le vodcenca the le sudcenca andral peskre fori, medik pes amendar na odvisarela le Devleskri bari čoli.“

<sup>15</sup> Ča o Jonatan, o čhavo le Asaheloskro, the o Jachzejah, o čhavo le Tikvoskro, pre oda na priačhile a o Leviti Mešulam the Šabetaj sas andre oda lenca.

<sup>16</sup> Ale savore okla Izraeliti, so sas ode, avke kerde. O rašaj o Ezdraš peske kidňa avri le famelijengre vodcen a zapisinda lengre nava. Andro ešebno džives andro dešto čhon pes zgele a chudle pal odi veca te vakere.

<sup>17</sup> A kerde oda savore muršenca, saven sas

cudza romňija, dži andro ešebno džives andre  
 ešebno čhon.

*O murša, save peske ile cudze romňijen*

<sup>18</sup> Kala hin o murša, saven sas romňija andral  
 aver narodi.

Le rašajendar pal lengre fameliji:

Andral e famelija le Ješuaskri, le Jocadakoskre  
 časkri: o Maasejah, o Eliezer, o Jarib the o  
 Gedaljah.

<sup>19</sup> On dine lav, hoj premukena peskre romňijen  
 a dojekh obetinela bakres vaš peskro binos.

<sup>20</sup> Andral e famelija le Imeroskri:  
 o Chanani the o Zebadijah.

<sup>21</sup> Andral e famelija le Charimoskri:  
 o Maasejah, o Elijah, o Šemajah, o Jechiel the  
 o Uziaš.

<sup>22</sup> Andral e famelija le Paščuroskri:  
 o Eljoenaj, o Maasejah, o Jišmael, o Netaneel,  
 o Jozabad the o Elasah.

<sup>23</sup> Le Levitendar:

o Jozabad, o Šimej, o Kelajah (oda hin  
 o Kelita), o Petachiah, o Jehudah the o  
 Eliezer.

<sup>24</sup> Le lavutarendar:  
 O Eljašib.

Le čhramoskre stražņikendar:  
 o Šalum, o Telem the o Uri.

<sup>25</sup> Okle Izraelitendar:

Andral e famelija le Parošoskri:

- o Ramiah, o Jizija, o Malkija, o Mijamin, o Eleazar, o Malkija the o Benajah.
- 26 Andral e famelija le Elamoskri:  
o Mataniah, o Zecharijah, o Jechiel, o Abdi, o Jeremot the o Elijah.
- 27 Andral e famelija le Zatuoskri:  
o Eljoenaj, o Eljašib, o Mataniah, o Jeremot, o Zabad the o Aziza.
- 28 Andral e famelija le Bebajoskri:  
o Jochanan, o Chananijah, o Zabaj the o Atlaj.
- 29 Andral e famelija le Baniskri:  
o Mešulam, o Maluch, o Adajah, o Jašub, o Šeal the o Jeremot.
- 30 Andral e famelija le Pachat-Moaboskri:  
o Adnas, o Kelal, o Benajah, o Maasejah, o Mataniah, o Becaleel, o Binuj the o Menaše.
- 31 Andral e famelija le Charimoskri:  
o Eliezer, o Jišijah, o Malkijah, o Šemajah, o Šimeon,  
32 o Benjamin, o Maluch the o Šemarijah.
- 33 Andral e famelija le Chašumoskri:  
o Matenaj, o Matatah, o Zabad, o Elifelet, o Jeremaj, o Menaše the o Šimej.
- 34 Andral e famelija le Baniskri:  
o Maadaj, o Amram, o Uel,  
35 o Benajah, o Bedjah, o Keluh,  
36 o Vanijah, o Meremot, o Eljašib,  
37 o Mataniah, o Matenaj, o Jaasav,  
38 o Bani, o Binuj, o Šimej,  
39 o Šelemiah, o Natan, o Adajah,  
40 o Machnadbaj, o Šašaj, o Šaraj,



<sup>41</sup> o Azarel, o Šelemiah, o Šemarijah,

<sup>42</sup> o Šalum, o Amariah the o Jozef.

<sup>43</sup> Andral e famelija le Neboskri:

o Jeiel, o Matitiah, o Zabad, o Zebinas, o  
Jadaj, o Joel the o Benajah.

<sup>44</sup> Savore kale muršen sas romňija andral aver  
narodi. Rozgele pes lenca a bičhade len het.  
Varesaven lendar sas imar the čhave.

**Le Devleskero Lav Andre Romaňi Čhib,  
Slovensko 2022**  
**Romani, Carpathian: Le Devleskero Lav Andre  
Romaňi Čhib 2022 (New Testament+)**

copyright © 2019 The Word for the World International and The Word  
for the World Slovakia

Language: Romanes (Romani, Carpathian)

Contributor: Eastern European Mission

**Eastern Slovak Romani Bible**

The Word for the World International

Eastern Slovak Romani belongs to the larger cluster of dialects designated 'Carpathian Romani.' The Roma people of Slovakia and the Czech Republic can read and understand the printed text. The audio is also understood by Roma in parts of Poland, Ukraine, and Romania.

Audio of the New Testament is available and that of the Old Testament is expected by the end of 2023.

The text and audio are accessible on YouVersion, Bible.com, Biblia.sk, Bible.is, <https://romani.global.bible>; etc. A standalone app can be downloaded from GooglePlay: search for E Biblia Andre Romani Chib.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-12-29

---

PDF generated using Haiola and XeLaTeX on 18 Apr 2025 from source files dated 15 Apr 2023

fb4d190f-4308-5aa8-bddb-58d53f07d849